

Mbanjdoenliz: Aeu Daegsaek Minz- cuz Bouxcuengh Byaij Ok Rog Bya

舌力屯：以壮民族特色走出山门

Wangz Gveiniogz iogj

Mbanjdoenliz ungsywk dwk tng youq ndaw rungi byasang.

Nazboh Yen Cwngzsiengh Cin Lungzvaz Cunh Mbanjdoenliz beix-nuengx Bouxcuengh gaenxhong gvaigvet, youq gak gaep cwngfuj sonyinx bangcoengh lajde, vatcimh caeuq cienzyiengz vwnzva minzcuz maenhndei, cauxguh binjbaiz lijyouz, laebhwnj aensuen fungcingz minzcuz Bouxcuengh, gyamaenh caeuq catbae canggyaeu aen ranzcanx gaeuq, aeu benjrin bu roen ndaw mbanj, guh le aen ciengzdiuqfoux gvangqbingz ndeu, hwnj miz mbanj ranzhek gig miz daegsaek, banh hwnj le ranz-gwnngaiz miz feihhom minzcuz, cauxlaeb le lijyouz fuzvu cungsim, aeu baengzromj ndaem guh baenz gij doxgaij lijyouz lai cungj lai yiengh haenx, hawj hom baengzromj riuz bae gyae, ciengxlwenx homrang.

Mbanjdoenliz dieg youq ndaw runghbya baihaek yienhsingz Nazboh, liz yienhsingz 14 goengleix gyae, miz 57 ranz 370 lai vunz, cienzbouh dwg Bouxcuengh. Diegyouq aenmbanj bya sang lueg laeg, cix mbouj ngamj vunz youq geijlai, hoeng vunzmbanj sim genq vunz ak, daih dem daih youq daengz seizneix, lij louzce miz gij sibgvenq fungsug gaeuqgeq sengcingz Bouxcuengh dangdieg. Vunzmbanj simsienh simsoh, hek daengz cix angq daih, fwen coux fwen soengq, hawj

bouxhek sim' angq simsangj. Vunzmbanj lij haengj daenj gij buhvaq baengzdoj aeu raemxromj nyumx dwk ndaemndwt haenx, daengz seizneix lij ngoenzngoenz nyumx baengz daemjrok, baengh dinfwngz gaeuqgeq canggyaeu bonjfaenh caeuq vunzranz; gyoengqde singqcingz hailangh, saedceij lai cungj lai yiengh, saimbwk lauxnyaeq cungj rox eu fwen diuq foux, baez daengz ngoenzciet roxnauz hek daengz, ndaw mbanj sing fwen sing go goksasa, vunz lai angqyangz diuqfoux doenghyegyeg. Cawz gijneix le, ndaw mbanj lij swncienz gij fungsug gaeuqgeq cangqhaem, aeuyah haqlwg haenx, hawj vunzhek haeuq mbanj le engq roxnyinh miz cungj heiq gaeuqgeq gyaeig laeglwd yinxvunz ndeu.

Vih gajbienq yienghsienq runghbya gungzndoq de, baijyienj ok gij fungcingz vwnzva minzcuz gaeuqgeq sengcingz neix youq baihnaj vunzbiengz bae, daj bi 2002 gvaqdaej, Nazboh Yenveij Yen Yinzminz Cwngfuj couh dajveh hwngfat hong lijyouz Mbanjdoenliz, caemhcai comz ngaenz henhoh ndei gij ranzcanx gaeuqgeq ndaw mbanj, vatcimh baujhoh gij vwnzva minzcuz Bouxcuengh ndaw mbanj, hawj yiengh mbanj louzce gij yiengh gaeuqgeq

gaxgonq de, fuengsik gaeuqgeq gvaq saedceij vunz lai caemh ndaej louz-cienz roengzdaej, baenz aen mbanj fungcingz minzcuz lijyouz gyawjgyae mizmingz ndeu. Daj bi de gvaqdaej, ndaw mbanj gaenq gonqlaeng ciepcoux daihhek cibgeij fanh vunzbaez, lijyouz souhaej gyawj 2000 fanh maenz. Vunzmbanj caemh doenggyaq caeuq vunz rog bya doxgyau, bienqbaenz uk lingz fwngz riengj, mbanj hauxseng okrog dajgoeng, mbanj mehmbwk cix youq ranz daemjrok guh buhvaq baengzromj, aendomq, gaenhoz gai, souhaej bi beij bi lai, saedceij caemh yied gvaq yied vuenyungz.

Byaij haeuq Mbanjdoenliz, vunzhek ndaej caennadang daejniemh gij sibgvenq fungsug Bouxcuengh dangdieg, dinfwngz ndawbiengz caeuq gij yienjok daiq miz yiengh gaeuqgeq sengcingz doenghij vwnzva minzcuz Bouxcuengh neix, dingq vunzmbanj eu fwen couxhek gingqlaeu, lij ndaej caeuq lwgsau ndaw mbanj diuq foux guh' angq, caemh ndaej bae yawj nyumx baengzromj caeuq daemjrok, vanlij ndaej caenfwnz bae muh haeuxyangz guh daeuhfouh dem, hawj bouxhek ndaej angqyangz yiengjsouh gij saedceij cwxcaih vuenyungz mbanjbya haenx.



▲ Ranzcanx gaeuqgeq ndaw mbanj.



▲ Vunzmbanj yienj foux-cungqndaem.



▲ Lwgmbwk ndaw mbanj lauxnyaeq rox daemjrok dajsiuq.



▲ Mehmbwk bauxboux rox daemjrok.



▲ Daih hek couh eu fwen gingqlaeu.



▲ Ngoenzciet, canghsae ndaw mbanj daiq vunzmbanj caeqcuengq.



▲ Lwgsau ndaw mbanj caeuq hekyouz doiq fwen.



▲ Dabsau gaem gaenhoz angqcoux hek daengz.



▲ Vunzhek doxcanj cawx gij baengzromj ndei yawj haenx.